



司空曙集卷上

五言古詩

早春遊望

東風春未足試望秦城曲  
青草狀寒蕪黃花似秋  
菊壯將歡共去老與悲  
相逐獨作遊社人暮過  
威宿

送程秀才

悠悠多路歧相見又別離  
東風摧節換啖啖春陽  
散楚草漸煙絲江雲亦蕪  
漫送子恨何窮故關如  
夢中遊人盡還北旅鴈辭  
南國楓樹幾回青逐臣

歸不得

七言古詩

擬百勞歌

朱絲細絃金點雜雙蒂芙蓉共開合誰家稚女着  
羅裳紅粉青眉嬌暮粧木難作牀牙作席雲母屏  
風光照壁玉顏年幾新上頭迴身斂笑多自羞紅  
銷月落不復見可惜當時誰拂面

迎神

吉日兮臨水沐青蘭兮白芷假山鬼兮請東皇託  
靈均兮邀帝子吹參差兮正苦舞婆娑兮未已鸞

旌圓蓋望欲來山雨霏霏江浪起神旣降兮我獨  
知自成再拜爲陳詞

送神

神之去迴風嫋嫋雲容與桂樽瑤席不復陳蒼山  
綠水暮愁人

殘鷺百轉歌同王員外耿拾遺吉中孚李  
端遊慈恩各賦一物

殘鷺一何怨百轉相尋續始辨下將高梢分長復  
促綿蠻巧狀語機節終如曲野客賞應遲幽僧聞  
詎足禪齋深樹夏陰清零落空餘三兩聲金谷箏

中傳不似山陽笛裏寫難成憶昨亂啼無遠近晴  
宮曉色偏相引送暖初隨柳色來辭芳暗逐花枝  
盡歌殘鶯歌殘鶯悠然萬感生謝眺羈懷方一聽  
何郎閑吟本多情乃知衆鳥非儔比暮噪晨鳴倦  
人耳共愛奇音那可親年年出谷待新春此時斷  
絕爲君惜明日玄蟬催髮白

長林令衛象錫絲結歌

主人瑯盤盤素絲寒女眷眷墨子悲乃言假使錫  
爲之八珍重沓失顏色手援玉節不敢持始狀芙  
蓉新出水仰折重衣傾萬藥又如合歡交亂枝紅  
茸向暮花參差吳蠶絡繹抽尚絕細縷織毫看欲  
滅雪髮羞垂委墮髮繡囊畏並茱萸結我愛此絲  
巧妙絕世間無爲君作歌陳座隅

五言律詩

送永陽崔明府

古國群舒地前當桐栢關連綿江上雨稠疊楚南  
山沙館行帆息楓州候吏還乘藍若有暇精舍在  
林間

送曹三同猗游山寺

山踏青蕪盡涼秋古寺深何時得連策此夜更聞

琴窮水雲同穴過僧虎共林殷勤如念我遺爾掛  
冠心

送崔校書赴梓幕

碧峰天柱下鼓角鎮南軍管記催飛檄蓬萊輟校  
文棧霜朝似雪江霧晚成雲想出襄中望巴庸方  
路分

送夔州班使君

魚國巴庸路麾幢漢守過曉櫓爭市隘夜鼓祭神  
多雲白當山雨風清滿峽波夷陵舊人吏猶誦兩  
歧歌

送菊潭王明府

業成洙泗客皓髮着儒衣一與遊人別仍聞帶印  
歸林多宛地古雲盡漢山稀莫愛潯陽隱嫌官計  
亦非

送大易上人赴東洛

遙見登山處青蕪雪後春雲深嶽廟火寺宿洛陽  
人餌藥時齋折唯詩與道親凡經幾回別塵尾不  
離身

冬夜耿拾遺王秀才就宿因傷故人

舊時聞笛淚此夜重沾衣方恨同人少何堪相見

詞賦明集卷上  
稀竹煙凝澗壑林雪似芳菲多謝勞車馬應憐獨  
掩扉

早春遊慈恩南池

山寺臨池水春愁望遠生踏橋逢鶴起尋竹值泉  
橫新柳絲猶短輕蘋葉未成還如虎溪上日暮伴  
僧行

雨夜見投之作

出戶繁星盡池塘暗不開動衣涼氣度逋樹遠聲  
來燈外初行電城隅偶隱雷因知謝文學曉望比  
塵埃

龍池寺望月寄韋使君闔別駕

清光此夜中萬古望應同當野山沉霧低城樹有  
風花宮紛共遂水府皓相空遙想高樓上唯君對  
庾公

秋夜憶興善院寄苗發

右軍多住寺此夜後池秋自與山僧伴那因洛客  
愁卷簾霜靄靄滿目水悠悠若有詩相贈期君憶  
惠休

病中寄鄭十六兄

倦枕欲徐行開簾秋月明手便筇杖冷頭喜葛巾

輕綠草前侵水黃花半上城虛消此塵景不見十年兄

衛明府寄枇杷葉以詩答之

傾筐呈綠葉重疊色何鮮詎是秋風裏猶如曉露傳仙方當見重消疾本應便全勝甘蔗贈空投謝氏篇

過慶寶寺

黃葉前朝寺無僧寒殿開池晴龜出曝松暮鶴飛回古井碑橫草陰廊盡雜苔禪宮亦銷歇塵世轉堪哀

和張大夫酬高山人

野客居鈴閣重開將校稀豸冠親轂弁龜印識荷衣座右寒飈爽談餘暮角微蒼生須太傅山在豈容歸

送嚴使君遊山

家楚依三戶辭州選一錢酒杯同寄世客棹任銷年赤燒兼山遠青蕪與浪連青春明月夜知上鄂君船

送柳震歸蜀

白日雙流靜西看蜀國春桐花能乳鳥竹節競祠

神蹇步徒相望先鞭不可親知從江僕射登榻更  
何人

送樂平苗明府

天際山多處東安古邑深綠田通竹里白浪隔楓  
林詩有江僧和門唯越客尋應將放魚一境表  
吾心

贈送鄭錢二郎中

梅含柳已動昨日起東風惆悵心徒壯無如髮作  
翁百年飄若水萬緒盡歸空何可宗禪客遲迴歧  
路中

謝鄭十四望驛不得同宿見贈因寄張參

軍

逢君喜成淚暫似故鄉中謫宦猶多懼清宵不得  
終月煙高有鶴宿草靜無蟲明日却超會應思下  
客同

暮春野望寄錢起

草長花落樹羸病強尋春無復少年意空餘華髮  
新青原高見水白社靜逢人寄謝南宮客軒車不  
可親

送王使君小子  
廉登科歸省



年少通經學登科尚佩觿張馮本名士蔡廓是佳  
兒鞍馬臨歧路龍鍾對別離寄書胡太守請與故  
人知

雲陽寺石竹花

一自幽山別相逢此寺中高低俱出葉深淺不分  
叢野蝶難爭白庭榴暗讓紅誰憐芳最久春露到  
秋風

送高勝重謁曹王

江上青楓岸陰陰萬里春朝辭郢城酒暮見洞庭  
人與比乘舟訪思懷倒屣親想君登舊榭重喜掃

芳塵

閒園書事招暢當

聞蟬晝眠後欹枕對蓬蒿羸病懶尋戴田園方詠  
陶傍簷蟲掛靜出樹蝶飛高惆悵臨清鏡思君見  
髮毛

過錢員外

爲郎頭已白跡向市朝稀移病居荒宅安貧着敗  
衣野園隨客醉雪寺伴僧歸自說東風下松蘿滿  
故扉

贈庾侍御

年少身無累相逢憶此時雪過雲寺宿酒向竹園  
期白髮今催老清琴但起悲唯應逐宗炳內學願  
為師

贈李端

共憶南浮日登高望若何楚田湖草遠江寺海榴  
多載酒尋山宿思人帶雪過東西幾回別此會各  
蹉跎

送流人

聞說南中事悲君重竄身山村楓子鬼江廟石郎  
神童稚留荒宅圖書託故人青門好風景為爾一

沾巾

過胡居士覩王右丞遺文

舊日相知盡深居獨一身閉門空有雪看竹永無  
人每許前山隱曾憐陋巷貧題詩今尚在暫為拂  
流塵

送郎使君赴郢州

使君持節去雲水滿前程楚寺多連竹江檣遠映  
城登樓向月望賽廟傍山行若動思鄉詠應貽謝  
步兵

賊平後送人北歸

世亂同南去時清獨北歸他鄉生白髮舊國見青山  
曉月過殘壘繁星宿故關寒禽與衰草處處伴  
愁顏

觀獵騎

纏臂繡綸巾貂裘窄稱身射禽風助箭走馬雪翻  
塵金埒爭開道香車爲駐輪翩翩不知處傳是霍  
家親

同苗員外宿薦福常師房

浮生共多故聚宿喜君同人息時聞磬燈搖乍有  
風霜塔疑水際夜木似山中一願持如意長來事

遠公

送喬廣下第歸淮南

遙想南淮盡荒堤楚路斜戍旌標白浪罟網入青  
葭啼鳥仍臨水愁人更看花東堂一枝在爲子惜  
年華

風箏

高風吹玉柱萬籟忽齊飄颭樹遲難度縈空細漸  
銷松泉鹿門夜笙鶴洛濱朝坐與真僧聽支頤向  
寂寥

閑居寄苗發

漸向浮生老前期竟若何獨身居處靜永夜坐時  
多厭逐青林客休吟白雪歌支公有遺寺重與謝  
安過

送王先生歸南山

儒中年最老獨有濟南生愛子方傳業無官自耦  
耕竹通山舍遠雲接雪田平願作門人去相隨隱  
姓名

寄天台秀師

天台瀑布寺傳有白頭師幻跡示羸病空門無住  
持雪晴看鶴去海夜與龍期永願親瓶屨呈功得

問疑

送夏侯審赴寧國

青圻連白浪曉日渡南津山疊陵陽樹舟多建業  
人煙霞高占寺楓竹暗停神如接玄暉集江城猶  
見親

雲陽館與韓紳宿別

故人江海別幾度隔山川乍見翻疑夢相悲各問  
年孤燈寒照雨濕竹暗浮烟更有明朝恨離杯惜  
共傳

送盧使君赴夔州

鏡管隨旌旆高秋遠上巴白波連霧雨青壁斷兼  
葭凭几雙童靜登樓萬井斜政成知變俗當應盡  
輪車

夜聞回鴈

鴈響天邊過高高望不分颼颼傳細雨嘹唳隔長  
雲散向誰家盡歸來幾客聞還將今夜意西海話  
蘇君

賦得的的帆向浦

向浦參差去隨波遠近還初移芳草裏正在夕陽  
間隱映回孤驛微明出亂山向空看不盡歸思滿

江關

秋思呈尹植裴說

靜向懶相偶年將衰共催前途歡不集往事恨空  
來晝景委紅葉月華銷綠苔沉思竟何有坐結玉  
琴衰

故郭婉儀挽歌

一日辭秦鏡千秋別漢宮豈唯泉路掩長使月輪  
空苦色凝朝露悲聲切暝風婉儀餘舊德仍載禮  
經中

送翰林張學士嶺南勒碑

漢恩天外洽周頌日邊稱文獨司空羨書兼太尉  
能出關逢北鴈度嶺逐南鵬使者翰林客餘春歸  
灞陵

送吉校書東歸

少年芸閣吏罷直暫歸休獨與親知別行逢江海  
秋聽猿看楚岫隨鴈到吳洲處處園林好何人待  
子猷

送鄭明府貶嶺南

青楓江色晚楚客獨傷春共對一樽酒相看萬里  
人猜嫌成謫宦正直不防身莫畏炎方久年年雨

露新

晚秋西省寄上李韓二舍人

晝漏傳清唱天恩禁旅秋鴈親承露掌砧隔曝衣  
樓賜膳中人送餘香侍女收仍聞勞上直晚步鳳  
池頭

下武昌江行

悠悠次楚鄉楚口下涔陽雪隱洲渚晴沙高蘆荻  
黃漁人共留滯水鳥自喧翔懷土年空盡春風又  
淼茫

送史由之峽州

峽口巴江外無風浪亦翻蒹葭新有鴈雲雨不離  
猿行客思鄉遠愁人賴酒昏檀郎好聯句共滯謝  
家門

送王閏

相送臨寒水蒼然望故關江蕪連夢澤楚雪入商  
山話我他年舊看君此日還因將自悲淚一灑別  
離間

江園書事寄盧綸

種柳南江邊閉門三四年俗人那勝竹凡鳥不如  
蟬嗜酒漸嬰渴讀書多欲眠平生故交在白首遠

相憐

送鄭况往淮南

西楚見南關蒼蒼落日間雲離火雷樹潮入秣陵  
山登戍因高望停橈放溜閑陳公有賢榻君去豈  
空還

題江陵臨沙驛樓

江天清更愁風柳入江樓鴈惜楚山晚蟬知秦樹  
秋淒涼多獨醉零落半同游豈獲平生意蒼然蘭  
杜洲

新蟬

今朝蟬忽鳴遷客若爲情便覺一年老能令萬感  
生微風方滿樹落日稍沉城爲問同懷者淒涼聽  
幾聲

送張弋

擁棹江天曠蒼然下鄭城冰霜蒹葭變雲澤鷓鴣  
鳴酒倦臨流醉人逢置榻迎嘗聞藉東觀不獨魯  
諸生

送僧無言歸山

袈裟出塵外山徑幾盤緣人到白雲樹鶴沉青草  
田龕泉朝請盥松籟夜和禪自昔聞多學逍遙註

一篇

和盧校書文若早入使院書事

解帶獨徘徊秋風如水來軒墀濕繁露琴杵拂輕  
埃晨鳥猶在葉夕蟲餘 苔蒼然發高興相仰坐  
難陪

送史澤之長沙

謝眺懷西府單車觸火雲野蕉依戍客廟竹映湘  
君夢渚巴山斷長沙楚客分一杯從別後風月不  
相聞

田家



田家喜雨足隣老相招携泉溢溝塍壞麥高桑柘  
低呼兒催放犢宿客待烹鷄搔首蓬門下如將軒  
冕齊

送盧堪

羈貧不易去此日始西東旅舍秋霖葉行人寒草  
風酒醒餘恨在野餞暫遊同莫使襴生刺空留懷  
袖中

送柳震入蜀

粉堞連青氣喧喧雜萬家夷人祠竹節蜀鳥乳桐  
花酒報新豐景琴迎抵峽斜多聞滯遊客不似在

天涯

送李嘉祐正字括圖書兼往揚州覲省

不事蘭臺貴全多韋帶風儒官比劉向使者得陳  
農晚燒平蕪外朝陽疊浪東歸來喜調膳寒筍出  
林中

送劉侍御

獄成收夜燭整豸出登車黃葉辭荆楚青山背漢  
初早朝新羽衛晚下步徒胥應念長沙謫思鄉不  
食魚

送龐判官赴黔中

天遠風煙異西南見一方亂山來蜀道諸水出辰  
陽堆案青油暮看碁盡角長論文誰可制記室有  
何郎

送人遊嶺南

萬里南遊客交州見桺條逢迎人易合時日酒能  
消浪曉浮青雀風溫解黑貂囊金如未足莫恨故  
鄉遙

送曹同椅

青山三十餘衆藝盡無如中散詩傳畫將軍扇續  
書楚田晴下鴈江日暖多魚惆悵空相送歡遊自

此踈

送鄂州張別駕襄陽覲省

蒼蒼峴亭路臘月漢陽春帶雪半山寺行沙隔水  
人王祥因就宦萊子不違親正恨殊鄉別千條楚  
桺新

送魏羔遊長沙覲兄

蘆荻湘江水蕭蕭萬里秋鶴高看迥野蟬遠入中  
流訪友多成滯携家不厭遊惠連仍有作知得從  
兄酬

九日落東亭

風息斜陽盡遊人曲落間採花因覆酒行草轉看  
山柳散新霜下天晴早鴈還傷秋非騎省玄髮白  
成斑

九日送人

送人冠獬豸值節佩茱萸均賦徵三壤登車出五  
湖水風淒落日岸葉颭衰蕪自恨塵中使何因在  
路隅

司空曙集卷上

司空曙集卷下

五言排律

題玉真觀公主山池院

香殿留遺影春朝玉戶開羽衣重素几珠網儼輕  
埃石自蓬山得泉經太液來柳絲遮綠浪花粉落  
青苔鏡掩鸞空在霞消鳳不迴唯餘古桃樹傳是  
上僊栽

和王卿立秋即事

秋宜何處看試問白雲官暗入蟬鳴樹微侵蟬繞  
蘭向風涼稍動近日暑猶殘九陌浮埃減千峰爽

氣攢換衣防竹暮沉果訝泉寒宮響傳花杵天清  
出露盤高禽當側弁遊鮪對憑欄一奏招商曲空  
令繼唱難

和李貞外詠冬瑰花寄徐侍郎

僊吏紫薇郎奇花共翫芳攢星排綠蒂照眼發紅  
光暗妬翻堦葉遙連直署香遊枝蜂繞易礙刺鳥  
銜妨露濕凝衣粉風吹散藥黃蒙籠珠樹合煥爛  
錦屏張畱客勝看竹思人比愛棠如傳採蘋詠遠  
思滿瀟湘

晦日益州北池陪宴

臨泛後公日仙舟翠幕張七橋通碧沼雙樹接花  
塘玉燭收寒氣金波隱夕光野聞歌管思水靜綺  
羅香遊騎縈林遠飛橈截岸長郊源懷灞漭陂澹  
寫江潢常侍傳花詔偏禪問羽觴豈令南峴首千  
載播餘芳

立秋日

律變新秋至蕭條自此初花酣蓮報謝葉在柳呈  
疎澹日非雲映清風似雨餘卷簾涼暗度迎扇暑  
先除草靜多翻鷺波澄乍露魚今朝散騎省作賦  
興何如

哭苗員外呈張參軍

思君窳家宅久接竹林期嘗值偷琴處親聞比玉  
時高人不異合弱冠早相知試藝臨諸友能文即  
我師凌寒松未老先暮槿何衰季子生前別羊曇  
醉後悲壽堂乖一慟奠席阻長辭因瀝殊方淚遙  
成墓下詩

送王使君赴太原拜節度副使

新從劉太尉結束向并州絡腦青絲騎盤囊錦帶  
鈎出關逢將校下嶺擁戈矛匣閉黃雲冷山傳畫  
角秋劍鋒將破虜道罷登樓豈作書生老當封

萬戶侯

過終南柳處士

雲起山蒼蒼林居蘿薜荒幽人老深境素髮與青  
囊雨滌莓苔綠風搖松桂香洞泉分溜淺巖筍出  
藜長敗屨安松砌餘碁在石牀書名一爲別還路  
已堪傷

同張參軍喜李尚書寄新琴

新琴傳鳳皇晴景稱高張白玉連徽淨朱絲繫爪  
長輕埃隨拂拭雜籟滿鏗鏘暗想山泉合如親蘭  
蕙芳正聲消鄭衛古狀掩笙篁遠識賢人意清風

願激揚

苦熱

暑氣發炎州焦煙遠未收  
嘯風兼熾艷揮汗訝成流  
鸛鵲投林盡龜魚擁石稠  
漱泉齊飲耐衣葛劇兼裘  
長簟貪歌枕輕巾懶掛頭  
招商如有曲一爲取新秋

七言律詩

閑園即事寄暕公

欲就東林寄一身尚憐兒女未成人  
柴門客去殘陽在藥圃蟲喧秋雨頻  
近水方同梅市隱曝衣多

笑阮家貧深山蘭若何時到羨與閑雲作四鄰

題暕上人院

閉門不出自焚香擁褐看山歲月長  
雨後綠苔生石井秋來黃葉遍  
繩牀身閑何處無真性年老曾言隱  
故鄉更說本師同學在幾時携手見衡陽

長安曉望寄程補闕

迢遞山河擁帝京參差宮殿接雲平  
風吹曉漏經長樂柳帶晴煙出禁城  
天淨笙歌臨路發日高車馬隔塵行  
獨有淺才甘未達多慙名在魯諸生

下第日書情寄上叔父

微才空覺滯京師，末學曾爲叔父知。  
雪裏題詩偏見賞，林間飲酒獨令隨。  
遊客盡傷春色老，貧居還惜暮陰移。  
欲歸江海尋山去，願報何人得桂枝。

南原望漢宮

荒原空有漢宮名，衰草茫茫雉堞平。  
連鴈下時秋水在，行人過盡暮煙生。  
西陵歌吹何年絕，南陌登臨此日情。  
故事悠悠不可問，寒禽野水自縱橫。

早夏寄元校書

獨遊野徑送芳菲，高竹林居接翠微。  
綠岸草深蟲入徧，青藜花盡蝶來稀。  
珠荷薦果香寒簾，玉柄搖風滿夏衣。  
蓬華永無車馬到，更當齋夜憶玄暉。

贈衡岳隱禪師

擁褐安居南嶽頭，白雲高寺見衡州。  
石窓湖水搖寒月，楓樹猿聲報夜秋。  
講席舊逢山鳥至，梵經初向竺僧求。  
自知身老將傳法，因下人間遂此遊。

題凌雲寺

春山古寺繞滄波，石磴盤空鳥道過。  
百丈金身開翠壁，萬龕燈焰隔煙蘿。  
雲生客到侵衣濕，花落僧禪覆地多。  
不與方袍同結社，下歸塵世竟如何。

送曲山人之衡州

白石先生眉髮光已分甜雪飲紅漿衣巾半染煙  
霞氣語笑兼和藥草香茅洞玉聲流暗水衡山碧  
色映朝陽千年城郭如相問華表峨峨有夜霜

酬張芬有赦後見贈

紫鳳朝銜五色書陽春忽布網羅除已將心變寒  
灰後豈料光生腐草餘建水風煙收客淚杜陵花  
竹夢郊居勞君故有詩相贈欲報瓊瑤恨不如

秋日趨府上張大夫

重城洞啓肅秋煙共說羊公在鎮年鼙鼓暗驚黃  
葉落旌旗遙拂鴈行偏石過橋下書曾受星降人

間夢已傳謫吏何能沐風化空將歌頌拜車前

寄衛明府常見短靴褐裘又務持誦是以

有末句之贈

紫桑官舍近東林兒稚初髻即道心側寄繩牀嫌  
凭几斜安苔憤嬾穿簪高僧靜望山僮逐走吏喧  
來水鴨沉翠竹黃花皆佛性莫教塵境誤相侵

酬李端校書見贈

綠槐垂穗乳烏飛忽憶山中獨未歸青鏡流年看  
髮變白雲芳草與心違乍逢酒客春遊慣久別林  
僧夜坐稀昨日聞君到城闕莫將簪弁勝荷衣



過盧秦卿舊居

五柳茅茨楚國賢，桔槔蔬圃水涓涓。  
黃花寒後難逢蝶，紅葉晴來忽有蟬。  
韓康助採君臣藥，支遁同看內外篇。  
爲問潛夫空著論，如何侍從賦甘泉。

酬崔峒見寄

趨陪禁掖鴈行隨，遷放江潭鶴髮垂。  
素浪遙疑太掖水，青楓忽似萬年枝。  
蒿南春遍愁魂夢，壺口雲深隔路岐。  
共望漢朝多沛澤，蒼蠅早晚得先知。

送王尊師歸湖州

煙蕪滿洞青山遶，幢節飄空紫鳳飛。  
金闕乍看迎日麗，玉簫遙聽隔花微。  
多開石髓供調膳，時御霓裳奉易衣。  
莫學遼東華表上，千年始欲一迴歸。

五言絕句

金陵懷古

輦路江楓暗，官潮野草春。  
傷心庾開府，老作北朝臣。

竹裏徑

幽徑行迹稀，清陰苔色古。  
蕭蕭風欲來，乍似蓬山雨。

黃子陂

岸芳春色曉水影夕陽微  
寂寂深煙裏漁舟夜不歸

田鶴

散下渚田中隱見菰蒲裏  
哀鳴自相應欲作凌風起

藥園

春園芳已遍綠蔓雜紅英  
獨有深山客時來辨藥名

石井

苔色遍春石桐陰入寒井  
幽人獨汲時先樂殘陽影

影

板橋

橫遮野水石前帶荒村  
道來往見愁人清風柳陰好

石蓮花

今逢石上生本自波中有  
紅艷秋風裏誰憐衆芳後

遠寺鐘

杳杳踈鐘發月風清後引  
中宵獨聽之似與東林近

松下雪

不隨晴野盡獨向深松積落照人寒光偏能伴幽  
寒

新柳

全欺芳蕙晚似妬寒梅疾撩亂發青條春風來幾  
日

唐昌公主院看花

遺殿空長閉乘鸞自不回至今荒草上寥落舊花  
開

別張讚

今日山晴後殘蟬菊發時登樓見秋色何處最相  
思

晚思

蛩餘窓下月草濕堦前露晚景淒我衣秋風入庭  
樹

留盧秦卿

知有前期在難分此夜中無將故人酒不及石尤  
風

哭麴山人

憶昔秋風起君曾嘆逐臣何言芳草日自作九泉

人

同賦

舊依支遁宿曾與戴顓來今日空林下唯知見綠苔

聞春雷

水國春雷早闐闐若衆車自憐遷逐者猶滯蟄藏餘

雜言

伏餘西景移風雨灑輕絺燕拂青蕪地蟬鳴紅葉枝

翫花與衛象同醉

衰髮千莖白他鄉一樹花今朝與君醉忘卻在長沙

七言絕句

登峴亭

峴山回首望秦關南向荊州幾日還今日登臨唯有淚不知風景在何山

詠古寺花

共愛芳菲此樹中千花萬萼裊枝紅遲遲欲去猶回望覆地無人滿寺風

發渝州却寄韋判官

紅燭津亭夜見君  
繁絃急管兩紛紛  
平明分手空江轉  
唯有猿聲滿水雲

送盧徹之太原謁馬尚書

榆落鷗飛關塞秋  
黃雲畫角見并州  
翩翩羽騎雙旌後  
上客親隨郭細侯

峽口送友人

峽口花飛欲盡春  
天涯去住淚沾巾  
來時萬里同爲客  
今日翻成送故人

病中嫁女妓

萬事傷心在目前  
一身垂淚對花筵  
黃金用盡教歌舞  
留與他人樂少年

江村即事

罷釣歸來不繫船  
江村月落正堪眠  
縱然一夜風吹去  
只在蘆花淺水邊

秋園

傷秋不是惜年華  
別憶春風碧玉家  
強向衰藂見芳意  
茱萸紅實似繁花

春送郭大之官

明府之官官舍春  
春風辭我兩三人  
可憐江縣間

無事手板支頤獨詠貧

送鄭錫

漢陽雲樹清無極蜀國風煙思不堪莫怪別君偏  
有淚十年曾事晉征南

送人歸黔府

伏波簫鼓水雲中長戟如霜丈旆紅油幕曉開飛  
鳥絕翩翩上將獨趁風

雜興

月沒遼城暗出師雙龍金角曉天悲黃塵滿目隨  
風散不認將軍鷲尾旗

歲暮懷崔峒耿緯

臘月江天見春色白花青柳疑寒食洛陽舊社各  
東西楚國遊人不相識

觀妓

翠蛾紅臉不勝情管絕絃餘發一聲銀燭搖搖塵  
暗下却愁紅粉淚痕生

過長林湖西酒家

湖草青青三兩家門前桃杏一般花遷人到處唯  
求醉聞說漁翁有酒賒

過閭采病居

言空曠集卷下  
每逢佳節何曾坐唯有今年不得遊張邴卧來休  
送客菊花楓葉向誰秋

司空曙集卷下

嚴維集卷上

五言律詩

酬劉員外長卿見寄

蘇耽佐郡時近出白雲司藥補清羸疾窓吟絕妙  
詞柳塘春水漫花塢夕陽遲欲識懷君意明朝訪  
檝師

酬王侍御西陵渡見寄

前年萬里別昨日一封書郢曲西陵渡秦官使者  
車柳塘薰晝日花水溢春渠若不嫌雞黍先令掃  
弊廬

酬普選二上人相期見寄

本意宿東林因聽子賤琴遙知大小朗已斷去來  
心夜靜溪聲近庭寒月色深寧知塵外意定後更  
成吟

送少微上人東南遊

舊遊多不見師在翟公門瘴海空山熱雷州白日  
昏片心應爲法萬里獨無人盡酬恩去平生未  
感恩

宿法華寺

一夕雨沉沉哀猿萬木吟陰龍常護法長老密看  
心魚梵空山靜紗燈古殿深無生久已學白髮浪  
相侵

同韓翃員外宿雲門寺

小嶺路雖近仙郎此夕過潭空觀月定澗靜見雲  
多竹翠煙深色松聲雨點和萬緣俱不有對境自  
垂蘿

奉和皇甫冉大夫夏日遊華嚴寺

初地華嚴會王家少長行到官龍節駐禮塔鴈行  
成蓮界千峰靜梅天一雨清禪庭未可戀聖主寄  
蒼生



九日陪崔峒郎中北山燕

上客南臺至重陽此會文菊芳寒露洗杯翠夕陽  
曛務簡人同醉溪閑鳥自群府中官最小唯有孟  
叅軍

荆溪館呈丘義與

失路荆溪上依仁忽暝投長橋今夜月陽羨古時  
州野燒明山郭寒更出縣樓先生能館我無事五  
湖遊

贈萬金

萬公長慢世昨日又曠官縱酒真彭澤論詩得建

安家山伯禹穴別墅少城干輒有時人至窓前白  
眼看

秋夜行船

扁舟時屬暝月上有餘輝海燕秋還去漁人夜不  
歸中流何寂寂孤棹也依依一點前村火誰家未  
掩扉

別至弘上人

勗稱弘偃少早歲草茅居年老從僧律生知解佛  
書衲衣求壞帛野飯拾春蔬章句無求斷詩中學  
有餘

詠孩子

嘉客會初筵宜時魄再圓衆皆含笑戲誰不點頰  
憐繡被花堪摘羅縠色欲妍將雛有舊曲還入武  
城絃

送李端

故園衰草遍離別正堪悲路出寒雲外人歸暮雪  
時少孤爲客早多難識君遲掩泣空相憶風塵何  
所期

送桃巖成上人歸本寺

長老歸緣起桃花憶舊巖清晨雲抱石深夜月籠

杉道具門人捧齋糧谷鳥銜餘生願依止文字欲  
三緘

酬耿緯拾遺題贈

掩扉嘗自靜驛吏忽傳呼水巷驚馴鳥藜牀起病  
軀顧身悲欲老戒子力爲儒明日公西去煙霞復  
作徒

送薛尚書入蜀

卑情不敢論拜手立轅門列郡諸侯長登朝八座  
尊疑笳臨水發行旆向風翻幾許遺黎泣同懷父  
母恩

一公新泉

山下新泉出泠泠此發源落池纔有響噴石未成  
痕獨映孤松色殊分衆鳥喧唯當清夜月觀此啓  
禪門

送李秘書往儋州

魑魅曾爲伍蓬萊近拜郎臣心瞻北闕家事在南  
荒莎草山城小毛洲海驛長玄成知必大寧是泛  
滄浪

白雲陽歸晚泊陸澧宅

天陰行易晚前路故人居孤棹所思久冒寒相見

初聞燈忘夜永清漏任更踈明發還須去離家幾  
歲除

留別鄒紹先劉長卿員外

中年從一尉自歎此身非道在甘微祿時輕耻息  
機晨趨本郡府晝掩故山扉待得干戈畢何妨更  
採薇

贈送朱放

昔年居漢水日醉習家池道勝迹常在名高身不  
知欲依天日住新自始寧移生事仍無長惟將白  
接離

陪皇甫冉大夫謁禹廟

竹使羞殷薦松龕拜夏祠爲魚歌德後舞羽降神  
時文衛瞻如在精靈信有期夕陽陪醉止塘上鳥  
咸遲

同王徵君湘中有懷

八月洞庭秋瀟湘水北流還家萬里夢爲客五更  
愁不用看書帙偏宜上酒樓故人京洛滿何日復  
同游

送崔子向

旅食來江上求名赴洛陽新詩宗謝守內學似支

郎行怯秦爲客心依越是鄉何人作知己送爾淚  
浪浪

送舍弟

疎懶吾成性才華爾自強早稱眉最白何事綬仍  
黃時暑嗟千邁家貧念聚糧祗應宵夢裏詩興屬  
池塘

酬謝侍御喜王宇及第見賀不遇

寂寞柴門掩經過柱史榮老夫寧有力半子自成  
名柳映三橋發花連上道明緘書到別墅郢曲果  
先成

秋日與諸公文會天口寺

相訪從吾道因緣會爾時龍盤餘帝宅花界古人  
祠明月虛空色青林大小枝還將經濟學來問道  
安師

僧房避暑

支公好閒寤庭宇愛林篁幽曠無煩暑恬和不可  
量蕙風清水殿荷氣雜天香明月談空坐恬然道  
術忘

晦日宴遊

晦日湔裾俗春樓致酒時出山還已醉謝客舊能

詩谿柳薰晴淺巖花待閏遲為邦久無事比屋自  
熙熙

九月十日即事

家貧惟種竹時幸故人看菊度重陽少林經閏月  
寒宿醒猶落帽華髮強扶冠美景良難得今朝更  
盡歡

夏日納涼

山陰過野客鏡裏接僊郎盟漱臨寒水褰闥入夏  
堂杉松交日影枕簟上湖光衮衮承嘉話清風納  
晚涼

示外甥

牽役非吾好寬情爾在傍經過悲井邑起坐倦舟  
航卜宅生應貴逢時學可強無輕吾未用世事有  
行藏

晚霽登王六東閣

試上江樓望初逢山雨晴連空青嶂合向晚白雲  
生美惡列殊觀蕭條見遠情望來不可極日暮水  
流清

嚴維集卷上

嚴維集卷下

五言排律

送丘爲下第歸蘇州

滄江一身客獻賦空十年明主豈能好今人誰舉  
賢國門稅征駕旅食謀歸旋曠日媚春水綠蘋香  
客船無媒既不達余亦思歸田

剡中贈張侍御

辟疆年正少公子貴初還早列公卿位新叅柱史  
班千夫馳驛道駟馬入家山深巷烏衣盛高門畫  
戟閑逶迤天樂下照耀剡溪間自賤遊章句空爲

衰草顏

奉和劉祭酒傷白馬

沛艾如龍馬來從上苑中  
棣華恩見賜伯舅禮仍  
崇鏡點黃金眼花開白雪  
驄性柔君子德足逸大  
王風色點鳴珂淨聲連噴  
玉雄食場恩未盡過隙  
命旋終練影依雲沒銀鞍  
向月空仍聞樂府唱猶  
念代勞功

奉和獨孤中丞游雲門寺作

絕壑開花界耶溪極上源  
光輝三獨座登陟五雲  
門深木鳴騶馭晴山躍武  
賁亂泉觀坐卧踈磬發  
朝昏蒼翠新秋色莓苔積  
雨痕上方看度鳥後夜  
聽吟猿異跡焚香對新詩  
酌茗論歸來還撫俗諸  
老莫攀轅

水精環

玉室符長慶環中得水精  
任圓循不極見素質仍  
貞信是天然瑞非因樸斲  
成無瑕勝玉美至潔過  
冰清未肯齊珉價寧同雜  
珮聲能銜任黃雀亦欲  
應時明

奉和皇甫冉大夫祈雨應時雨降

政和知必感歲旱未書灾  
伯禹明靈降元戎禱請

來九成陳夏樂三獻奉殷壘掣曳旗交電鏗鏘鼓  
應雷行雲依蓋轉飛雨逐車回欲識皇天意爲霖  
覓在哉

贈別劉長卿時起河南嚴中丞幕府

早見登郎署同時跡下僚幾年江路永今去國門  
遙文變騷人體官移漢帝朝望山吟度日接枕話  
通宵萬里趨公府孤帆恨信潮匡時知己老聖代  
耻逃堯

題鮑行軍小閣

宇下無留事經營意獨新文房已得地相閣是推  
輪席上招賢急山陰對雪頻虛明先日暮啓閉異  
冬春談笑兵家法逢迎幕府賓還依負暄處時借  
在陰人

哭靈一上人

一公何不在空有遠公名共說岑山路今時不可  
行舊房松更老新塔草初生經論傳緇侶文章遍  
墨卿禪林枝幹折法宇棟梁傾誰復脩僧史應知  
傳已成

七言律詩

送崔峒使往睦州兼寄薛司



如今相府用英髦獨往南州肯苦勞  
冰水近開漁浦出雪雲初卷定山高  
木奴花映桐廬縣青雀舟隨白露濤  
使者須應訪廉吏府中唯有范功曹

九日登高

詩家九日憐芳菊逐客高齋瞰浙江  
漁浦浪花搖素壁西陵樹色入秋窓  
木奴向熟懸金實桑落新開瀉玉缸  
四子醉時爭講德笑論黃霸屈爲邦

送薛居士和州讀書

孤雲獨鶴共悠悠萬卷經書一葉舟  
楚地巢城民舍少煙村社樹鷺湖秋  
蒿萊織妾晨炊黍隅地耕

童夕放牛年少不應辭苦節諸生喜遇一封侯

餘姚奉寄鮑參軍

童年獻賦在皇州方寸唯思君與侯  
萬事無成新白首兩春虛擲對滄流  
歌詩盛賦文星動簫管新亭晦日遊  
知己欲依何水部鄉人今正賦東丘

謝諸公宿鏡水宅

幸免低頭向府中貴將藜藿與君同  
陽鴈叫霜來枕上寒山映月在湖中  
詩書何德名夫子草木推年長數公  
聞道漢家偏長少此身那比訪芝翁

題茅山李尊師所居

天師百歲少如童不到山中更不逢洗藥每臨新  
瀑水步虛時繞最高峯籬根五月留殘雪座右千  
年蔭古松此去人寰知近遠迴看路隔一重重

書情獻相公

年來白髮欲星星誤却生涯是一經魏闕望來何  
日見商歌奏罷復誰聽孤根獨棄慙山木弱質無  
成狀水萍今日更須詢哲匠不應休去老巖扃

送房元直赴京

猶道樓蘭千萬師書生匹馬去何之臨歧未斷還  
家目望月空吟出塞詩常欲激昂論上策不應顛

顛老明時遙知到日逢寒食彩筆長裾會晉祠

書情上李蘇州

東土苗人尚有殘皇皇亞相出朝端手持國憲群  
僚畏口喻天慈百姓安禮數自憐今日絕風流空  
計往年歡誤着青袍將十載忍來漁浦却垂竿

五言絕句

送人入金華

明月雙溪水清風八詠樓少年爲客處今日送君  
遊

江南三月

江南季春天，尊菜細如絃。湖邊草作逕，湖上葉如船。

六言

答劉長卿蛇浦橋月下重送之作

月色今宵最明，庭閒夜久天清。寂寞多年老宦，殷勤遠別深情。溪臨脩竹煙色，風落高梧雨聲。耿耿相看不寐，遙聞遠拆山城。

七言絕句

丹陽送韋參軍

丹陽郭裏送行舟，一別心知兩地秋。日晚江南望

江北寒鴉飛盡水悠悠

歲初喜皇甫侍御至

湖上新正逢故人，情深應不笑家貧。明朝別後門還掩，脩竹千竿一老人。

相里使君宅聽惠澄上人吹小管

秦僧吹竹閉秋城，早在梨園稱主情。今夕襄陽山太守，坐中流淚聽商聲。

宿天竺寺

方外主人名道林，怕將水月淨身心。居然對我說無我，寤歷山深將夜深。

嚴維集卷下  
六  
答劉長卿員外七里瀨重送

新安非欲枉帆過海內如君有幾何醉裏別時秋  
水色老人南望一狂歌

發桐廬寄劉長卿員外

處處雲山無盡時桐廬南望轉參差舟人莫道新  
安近欲上潺湲行自遲

嚴維集卷下

